

بِسْمِ اللَّهِ الرَّحْمَنِ الرَّحِيمِ

“مَثَلُ الَّذِينَ يُنْفِقُونَ أَمْوَالَهُمْ فِي سَبِيلِ اللَّهِ كَمَثَلِ حَبَّةٍ أَنْبَتَتْ سَبْعَ سَنَابِلٍ فِي كُلِّ سَنَابِلَةٍ مِائَةٌ حَبَّةٌ وَاللَّهُ يُضَاعِفُ لِمَنْ يَشَاءُ وَاللَّهُ وَاسِعٌ عَلِيمٌ”

(سورة البقرة: 261)

“Oni koji imanja svoja troše na Allahovu putu liče na onoga koji posije zrno iz kojeg nikne sedam klasova i u svakom klasu po stotinu zrna. – Allah će onome kome hoće dati i više; Allah je neizmjerljivo dobar i sve zna.”

(Suretu-l-Bekare: 261. ajet)

VAKUFNAMA

U ime Allaha, Svemilosnog, Samilosnog!

Hvala Allahu, dž.š., Koji je osvijetlio prostor svjetiljkama, čije svjetlo blista i Koji je izgradio površinu Zemlje džamijama, stjecištima pobožnih ljudi, Koji je zavijestao Džennet za one koji vrše dobra djela i koji je odredio džennetske bašče za one koji svoju imovinu troše u bogougodne i dobrotvorne svrhe i koji je umnogostručio nagradu za dobro djelo koje proističe iz iskrenog nijeta: „kao što je zrno od koga nikne sedam klasova, u svakom klasu po stotinu zrna”. Allah, dž.š., je blagoslovio Svoga Poslanika i miljenika, imama svih vjerovjesnika, Muhammeda, a.s., njegovu časnu porodicu, vjerne ashabe, čestite i čiste supruge, potomke i velike učenjake koji ga slijede, a koji je rekao: "Kad čovjek umre, prestaje (mu teći nagrada) od svih njegovih djela, osim od ovih troje: nauke kojom se ljudi koriste, dobrog djeteta koje se za njega moli i zadužbine." Svakom razumnom čovjeku je jasno da je ovaj svijet prolazan i u njemu neće ostati. On je prolaz kroz koji se prelazi u Džennet ili Džehennem, pa je razuman onaj koji se na ovom svijetu ne prevvari i ne dozvoli da ga zavedu njegovi prividni ukrasi, te čini dobra djela, a dobra djela poništavaju loša. Najcjjenjenije dobro djelo je sadaka, najbolja sadaka je ona koja je najtrajnija, a najljepši hajrat je onaj koji ostaje i koristi drugima. Jasno je da je to vakuf čije koristi ne prestaju niti se njegovo djelovanje završava do Sudnjeg dana. Shvativši sadržaj ovih načela i uvjerivši se u istinitost ovih riječi: "Dobro djelo koje učinite naći ćete kod Allaha, dž.š." Vođen idejom Milostivog, **Asim Hamidović sin Nedžiba i Hajrije**, rođene Čuk, dao je da se od svog čistog dijela imetka, koji mu je Dragi Allah, dž.š., podario, u ime Allaha, dž.š., a za dušu svojih rahmetli roditelja i na radost džematlija, sagradi nova džamija na mjestu stare srušene džamije u ratnim zbivanjima 28. augusta 1993. god. Ponovno otvaranje novoizgrađene džamije upriličeno je na mubarek-dan 17. jula 2005. god. Objekat džamije je veličine 14,5 m dužine, 13,5 m širine. U prizemlju džamije dao je sagraditi: mihrab, prostor za klanjanje, uveo vodu, dvije abdesthane, dva toaleta, prostor sa stalažama za ostavljanje odjeće i obuće, postavio nove ćilime, te tako omogućio džematlijama klanjanje namaza, držanje hutbi, učenje Kur'ana i svega drugog što uobičajeno džamije omogućavaju. Na spratu džamije nalazi se prostor za klanjanje ženskih osoba. Također na spratu nalazi se mekteb koji je opremljen stolovima, stolicama i najsavremenijom kompjuterskom opremom za održavanje mektebske nastave. Ova džamija pored svoje uobičajene uloge imat će posebnu važnost u smislu povratka i opstanka naroda ovoga kraja. Stoga ko bi učinio bilo kakvo

djelovanje u ovoj džamiji koje nije u skladu sa tradicionalnim bošnjačkim poimanjem učenja islama, tj. po Hanefijskom mezhebu ili onemogućio djelovane ovog mezheba u ovoj džamiji, učinio bi velik i neoprostiv grijeh. U ovom vakufu bezuvjetno će se poštivati propisi Rijaseta IZ Bosne i Hercegovine. Vakif je svojim novčanim sredstvima značajno učestvovao u izgradnji džamijske kuće, kao i četiri pomoćna objekta za nesmetano funkcioniranje ukazanih potreba džemata. Vakif je dao izgraditi: betonsku ogradu oko džamijskih objekata, izbetonirao cijelo dvorište sa betonskim flasterima, dvije željezne kapije, šadrvan ispred džamije, uredio kompletno svu hortikulturu u dvorištu džamije. Također, vakif je u prizemlju džamijske kuće dao izgraditi klub-obrazovni centar površine cca 100 m². Ugradio je: sve nove prozore, nova vrata i granitni pod, odgovarajući šank, toalet sa svom sanitarnom opremom, potrebni inventar sa stolovima, stolicama, različitim posuđem, bibliotekom sa velikim brojem knjiga i najsavremeniju elektronsku opremu. Prostor je namijenjen svim potrebama džematlija u skladu sa našim islamskim običajima kao i našom islamskom tradicijom i kulturom. Također vakif je dao sagraditi hair-česmu i obezbijediti poseban dovod vode iz Hamidovića mahale. Sve gore navedeno predat će se i uknjižiti kao vakuf. Stoga, od sada nije dozvoljeno ovaj vakuf promijeniti niti obustaviti rad tako da se protivi sadržaju ove isprave. Nije nikome dopušteno ko vjeruje u Boga, Poslanika i Sudnji dan, bio on vladar, ministar, sudija, vjerski službenik, da pokvari ili obustavi rad ovog vakufa ili promijeni neku njegovu odredbu. Ko bi to učinio, počinuo bi zlo i prouzrokovao sebi veliki grijeh shodno riječi Božijoj: "Zar nije Božije prokletstvo nad nasilnicima?" ili riječi Pejgamberovoj: "Pedalj zemlje što ga čovjek bespravno uzme od svoga brata muslimana, Bog će ga objesiti o vratu od sedam zemalja u paklenoj vatri." Stoga, ko protivno radi Božijoj knjizi i odredbama Njegovog Poslanika, taj je navukao na sebe Božiju mržnju i njegovo je utočište pakao gdje će mu doći prokletstvo Božije, meleka i čitava svijeta. Bog će ga kazniti onog dana kada nasilnicima neće koristiti njihovo izgovaranje, nego će im tada biti samo prokletstvo i zla kuća; onog Dana kada će svaka duša naći ono što je stekla od dobra i zla, tog Dana nema nikome zuluma, a Bog brzo svodi račune. Nagrada vakifu za njegove dobre namjere pripada kod Premilostivog Gospodara, a On neće uskratiti nagradu dobrim ljudima, niti će odbiti molitve muslimana. Želja je vakifova da se na 27. noć ramazana njegovim roditeljima, roditeljima njegove supruge, njemu i njegovoj supruzi nakon preseljenja na ahiret jedanput godišnje prouči hatma. Za ljubav Allaha, dž.š., Koji nam svjetlost daje, tražeći zadovoljstvo Gospoda Koji svime upravlja i sve Može! Brigu o vakufu vodit će džematski imam i Džematski odbor koji će sačinjavati pet članova (imam i četiri člana džemata). Ulogu mutevelije obavljat će predsjednik Džematskog odbora. Za predsjednika, tj. muteveliju i Džematski odbor mogu biti predlagani i birani samo džematlije koje su svojim nesebičnim radom, dobročinstvom, stečenim ugledom i poštovanjem u džematu i svojim ličnim radom i materijalno pomagali rad i djelovanje ove džamije. Nadzor nad ovim vakufom vršit će glavni imam MIZ Jajce, vakif lično sve dok je živ i njegova djeca.

Neka se na navedenim nekretninama islamski i domaćinski postupa!

Svjesni da je ovaj svijet prolazan i nestalan, te da će se plodovi našega truda ubirati na Budućem svijetu, molimo Allaha, dželle še'nuhu, da ovaj džemat, ovaj kraj, ovu zemlju i sav ummet našeg Poslanika, s.a.v.s., zaštiti od svih zala i ne dovede nas u iskušenja koja nećemo moći podnijeti i da nas učini sigurnim za veličanje Allahova Imena!

Gospodaru, upiši ovo djelo u knjigu dobrih djela i budi nam Milostiv na Sudnjem danu!

Dana: ____ . ramazana 1436. h.g.

V a k i f :

____. jula 2015. god.

Vakufska direkcija Sarajevo

Knjiga vakifa III br: 590


Asim Hamidović

Direktor Vakufske direkcije

dr. Senaid Zajimović